

STATUT

Muslimanskog omladinskog saveza Švedske

Opće odredbe

Član 1

Muslimanski omladinski savez Švedske (u daljem tekstu MOS) je apolitična organizacija koja okuplja lokalne omladinske organizacije MOS-a.

Član 2

Djelatnost MOS-a zasniva se na Kur'anu i Sunnetu.

Član 3

MOS djeluje u okviru Islamske zajednice Bošnjaka u Švedskoj, a surađivat će sa sličnim organizacijama u i izvan Švedske.

Član 4

Zadatak MOS-a je očuvanje i razvijanje vjerskih, moralnih, kulturnih i demokratskih vrijednosti omladine i jednakosti među polovima.

Član 5

MOS će svoju aktivnost uskladiti sa zakonima Švedske.

Član 6

MOS redovno održava kontakte sa svojim članicama, usklađuje aktivnosti i dogovara zajedničke zadatke.

Član 7

MOS predstavlja svoje članice kod vlasti i institucija Švedske i Bosne i Hercegovine.

Član 8

MOS ima pečat okruglog oblika sa tekstom na bosanskom i švedskom jeziku.

Članstvo u MOS-u

Član 9

Omladina starosne dobi od 7 do 27 godina može postati članom MOS-a na način da istovremeno prihvati ovaj Statut i potvrdi svoj zahtjev za članstvo u MOS-u putem potpisivanja pristupnice pismeno ili elektronski.

Član 10

Dužnosti članica MOS-a su:

- da poštuje odredbe ovog Statuta
- da učestvuje u radu organa MOS-a
- da sprovodi odluke organa MOS-a
- da na traženje organa MOS-a dostavlja sve potrebne podatke i informacije

Član 11

Prava članica MOS-a su:

- da preko svojih predstavnika učestvuje u radu organa MOS-a
- da njeni članovi biraju i budu birani u organe MOS-a
- da budu redovno informirani o radu MOS-a

Član 12

Članstvo u MOS-u prestaje prestankom rada ili isključenjem matične zajednice.

Organi MOS-a

Član 13

Organi MOS-a su:

- Skupština
- Izvršni odbor
- Nadzorni organ
- Savjet MOS-a
- Izborna komisija
- povremene komisije i odbori

Član 14

Skupština je najviši organ MOS-a, a čine je predsjednici omladinskih organizacija i dva delegata. Organizacije koje imaju manje od 100 članova imaju jednog delegata.

Član 15

Skupština može raditi i punovažno odlučivati ako joj prisustvuje natpolovična većina delegata. U slučaju da u zakazano vrijeme početka Skupštine ne postoji kvorum, početak Skupštine odgađa se za sat vremena. Nakon toga Skupština počinje sa radom bez obzira na broj prisutnih.

Član 16

Radom Skupštine rukovodi predsjedništvo od pet članova koje skupština bira aklamacijom.

Član 17

Skupština odlučuje većinom glasova prisutnih. Izuzetak u odlučivanju je usvajanje i izmjena Statuta MOS-a, za koje je potrebna dvotrećinska većina.

Član 18

Zadaci Skupštine su:

- određuje opće smjernice za rad MOS-a
- usvaja Statut i druge akte MOS-a
- usvaja godišnji finansijski plan
- bira i razrješava organe MOS-a
- bira predsjednika Izvršnog odbora MOS-a
- obavlja i druge poslove od interesa za MOS

Član 19

Redovna godišnja Skupština, koja je ujedno i izborna, održava se svake godine u mjesecu februaru. Vanredna Skupština održat će se ako to zatraži jedna trećina članica ili ako Izvršni odbor zaključi da je neophodno održati vanrednu Skupštinu. U oba slučaja odluku o održavanju vanredne Skupštine donosi Izvršni odbor.

Član 20

Izvršni odbor je najviši izvršni organ MOS-a, a sačinjavaju ga predsjednik MOS-a i još 6 članova IO-a. Predsjednika MOS-a bira Skupština većinom glasova. Jedan potpredsjednik se bira od 6 članova IO-a. Po mogućnosti treba voditi računa i o polnoj zastupljenosti članova IO-a.

Član 21

Zadaci IO-a su da:

- koordinira rad članica MOS-a
- sprovodi odluke i zaključke Skupštine
- donosi godišnji program rada i radi na njegovom ostvarivanju
- radi na realizaciji finansijskog plana MOS-a
- o svom radu obavještava članice i organe Islamske zajednice
- za obavljanje određenih poslova formira stalne i povremene komisije

Član 22

Ukoliko neko od članova IO-a nije u mogućnosti da duže vrijeme (tri ili više mjeseci) obavlja svoje dužnosti, ili ukoliko mu iz bilo kojeg razloga prestane mandat, IO će izvršiti kooptiranje novog člana. Prije kooptiranja novog člana treba izvršiti konsultacije sa članicama MOS-a. Ukoliko iz bilo kojeg razloga predsjednik nije u mogućnosti obavljati svoju funkciju ili podnese ostavku, do zakazivanja vanredne Skupštine njegove poslove vrši jedan potpredsjednik, a najviše tri mjeseca. U tom periodu Izvršni odbor dužan je izvršiti sve pripreme i zakazati vanrednu Skupštinu.

Član 23

Nadzorni organ IZ Bošnjaka u Švedskoj automatski je Nadzorni organ MOS-a.

Član 24

Savjet MOS-a čine: predsjednik MOS-a, predsjednik IZ Bošnjaka u Švedskoj, glavni imam, te još dva člana. Savjet MOS-a ima samo savjetodavnu ulogu.

Član 25

Svi organi MOS-a dužni su donijeti svoj vlastiti poslovnik o radu.

Finansijsko poslovanje MOS-a

Član 26

Izvori prihoda MOS-a su:

- dotacije švedskih institucija
- članarina članica
- dobrovoljni prihodi i donacije
- druga sredstva koja MOS ostvari kroz svoj rad

Član 27

Ovlašteni potpisnici materijalno-finansijskih dokumenata MOS-a su: predsjednik, sekretar i blagajnik. Najmanje dvojica zajedno.

Završne odredbe

Član 28

MOS će organizovano djelovati sve dok za to postoji potreba. Odluku o raspuštanju MOS-a donosi Skupština dvotrećinskom većinom glasova ukupnog broja članova Skupštine. Prestankom rada MOS-a sva njegova imovina prepisuje se na ime IZ Bošnjaka u Švedskoj.

Član 29

Ovaj Statut je usvojen na Skupštini 1 juna 1997.g. u Örebro i zadnji put mijenjan na Skupštini 20. februara 2010.g. u Boråsu.

Ovaj tekst Statuta na osnovu usvojenih izmjena na Skupštini 20. februara 2010.g. u Jönköpingu ovjerava:

Izet Bešić



sekretar BEMUF-a



Jönköping, 31. mart 2010.g.